

乾隆汾州府志

汾州府志卷之二十

仕實

孫貞侯資字彥龍太原中都人魏國旣建與涿郡劉放俱爲秘書郎先是資歷縣令參丞相軍事文帝卽位放資轉爲左右丞黃初初改秘書爲中書以資爲中書令加給事中賜爵關中侯遂掌機密三年進爵關內侯明帝卽位尤見寵任加散騎常侍進爵樂陽亭侯太和末吳遣將周賀浮海詣遼東招誘公孫淵帝欲邀討之朝議多以爲不可惟資決行策果大破之進爵左鄉侯青龍初加侍中光祿大夫景初二年遼東平定以參謀之

功進爵封本縣資中都侯其年帝寢疾欲以燕王宇爲大將軍及領軍將夏侯獻武衛將軍曹爽屯騎校尉曹肇驍騎將軍秦朗共輔政宇性恭良陳誠固辭帝引見放資入卧內問曰燕王正爾爲放資對曰燕王寔自知不堪大任故耳曰曹爽可代宇不放資因贊成之又深陳宜速召太尉司馬宣王以綱維皇室帝納其言卽以黃紙授放作詔放資旣出帝意復變詔止宣王勿使來尋更見放資曰我自詔太尉而曹肇等反使吾止之幾敗吾事命更爲詔帝獨召爽與放資俱受詔命遂免宇獻肇則官太尉亦至登牀受詔然後帝崩齊王卽位以

放資決定大謀增邑三百資併前千戶封愛子一人亭
侯次子騎都尉餘子皆郎中正始元年更加資右光祿
大夫金印紫綬儀同三司六年資轉衛將軍領監令如
故七年復封子一人亭侯年老遜位以列侯朝朔望位
特進曹爽誅後復以資爲侍中領中書令嘉平二年資
復遜位歸第就拜驃騎將軍轉侍中特進如故三年薨
謚曰貞侯子宏嗣放才計優資而自修不如也放資旣
善承順主上又未嘗顯言得失抑辛毗而助王思以是
獲譏於世然時因羣臣諫諍扶贊其義并時密陳損益
不專導諛言云及咸熙中開建五等改封宏離石子

資別傳資幼而岐嶷三歲喪二親長於兄嫂講業太學博覽傳記周郡王允一見而奇之太祖爲司空又辟資會兄爲鄉人所害資手刃報讐乃將家屬避地河東故遂不應命尋復爲本郡所命以疾辭友人河東賈逵謂資曰足下抱逸羣之才值舊邦傾覆主將殷勤千里延頸宜崇古賢桑梓之義而久盤桓拒違君命斯猶曜和璧於秦王之庭而寒以連城之價耳竊爲足下不取也資感其言遂往應之到署功曹舉計吏尚書令荀彧見資歎曰北州承喪亂已久謂其賢智零落今日乃復見孫計君乎表留以爲尚書郎

辭以家難得還河東諸葛亮出在南鄭時議者以爲可因大發兵就討之帝意亦然以問資資曰昔武皇帝征南鄭取張魯陽平之役危而後濟又自往救出夏侯淵軍數言南鄭直爲天嶽中斜谷道爲五百里石穴耳言其深險喜出淵軍之辭也又武皇帝聖於用兵察蜀棲於山巖視吳竄於江湖皆撓而避之不責將士之力不爭一朝之忿誠所謂見勝而戰知難而退也今若進軍就南鄭道旣險阻計用精兵又轉運鎮守南方四州遏禦水賊凡用十五六萬人必當復更有所發興天下搔動費力廣大此誠陛下所宜

深慮夫守戰之力力役參倍但以今日見兵分命大將據諸要險威足以震攝疆寇鎮靜疆場將士虎睡百姓無事數年之間中國日盛吳蜀二虜必自罷弊帝由是止時吳人彭綺又舉義江南議者以爲因此伐之必有所克帝問資資曰鄱陽宗人前後數有舉義者衆弱謀淺旋輒乖散昔文皇帝嘗密論賊形勢言洞浦殺萬人得船千萬數日間船人復會江陵被圍歷月權裁以千數百兵住東門而其土地無崩解者是有法禁上下相奉持之明驗也以此推綺懼未能爲權腹心大疾急請殺之尋敗亡是時無歲不有軍

臣所及書傳所載皆聖聽所究向使漢高不知平勃
能安劉氏孝武不識金霍付屬以事殆不可言文皇
帝始召曹真還時親詔臣以重慮及至晏駕陛下卽
昨猶有曹休外內之望賴遭日月御勒不傾使各守
分職纖介不間以此推之親臣貴戚雖當據勢握兵
宜使輕重素定若諸侯典兵力均衡平寵齊愛等則
不相爲服不相爲服則意有異同今五營所領見兵
常不過數百選授校尉如其輩類爲有疇匹至於重
大之任能有所維綱者宜以聖恩簡擇如平勃金霍
劉章等一二人漸殊其威重使相鎮固於事爲善帝

曰然如卿言當爲吾遠慮所圖今日可參平勃侔金
霍雙劉章者其誰哉資曰臣聞知人則哲惟帝難之
唐虞之聖凡所進用明試以功陳平初事漢祖絳灌
等謗平有受金盜嫂之罪周勃以吹簫引疆始事高
祖亦未知名也高祖察其行跡然後知可付以大事
霍光給事中二十餘年小心謹慎乃見親信日殫夷
人以至孝質直特見擢用左右尙曰妄得一武夫而
重貴之平勃雖安漢嗣其終勃被反名平劣自免於
呂須之譏上官桀桑弘羊與霍光爭權幾成禍亂此
誠知人之不易爲臣之難也又所簡擇當得陛下所

親嘗得陛下所信誠非愚臣之所能識別臣松之以爲孫劉于時號爲專任制斷機密政事無不綜資放被託付之間當安危所斷而更依違其對無有適莫受人親任理豈得然案本傳及諸書並云放資稱贊曹爽勸召宣王魏室之亡禍基於此資之別傳出白其家欲以是言掩其大失然恐負國之玷終莫能磨也

張司空亮字伯德西河隰城人少有幹用初事尔朱兆拜平遠將軍以功封隰城縣伯邑五百戶高祖討兆於晉陽兆奔秀容兆左右皆密通誠款惟亮獨無啟疏及

兆敗竄於窮山。令亮及倉頭陳山提斬已首以降。皆不忍。兆乃自縊於樹。伯德伏屍而哭。高祖嘉歎之。授丞相府參軍事。漸見親。委以書記之任。天平中。爲世宗行臺郎中。典七兵事。雖爲臺郎。而常在高祖左右。遷行臺右丞。高仲密之叛也。與大司徒斛律金守河陽。周文帝於上流放火船燒河橋。亮乃備小艇百餘艘。皆載長鑠。鑠頭施釘。火船將至。卽馳小艇以釘釘之。引鑠向岸。火船不得及橋。橋之獲全。亮之計也。武定初。拜太中大夫。薛琠常夢亮於山上挂絲。以告亮。旦占之曰。山上絲幽字也。君其爲幽州乎。數月。亮出爲幽州刺史。屬侯景叛。除

平南將軍梁州刺史尋加都督揚潁等十一州諸軍事兼行臺殿中尙書轉都督二豫揚潁等八州軍事征西大將軍豫州刺史尙書右僕射西南道行臺攻梁江夏潁陽等七城皆下之亮性質直勤力彊濟深爲高祖世宗所信委以腹心之任然少風格好財利久在左右不能廉潔及歷諸州咸有黷貨之聞武定末徵拜侍中汾州大中正天保初授光祿勳加驃騎大將軍儀同三司別封安定縣男轉中領軍尋卒於位贈司空公

郭襄侯衍字彥文自云太原介休人也父以舍人從魏武帝入關其後官至侍中衍少驍武善騎射周陳王純

引爲左右累遷大都督時齊氏未平衍奉詔於天水募人以鎮東境得樂徙千餘家屯於陝城拜使持節車騎大將軍儀同三司每有寇至輒率所領禦之一歲數告捷頗爲齊人所憚王益親任之建德中周武帝出幸雲陽衍伺於行所時議欲伐齊衍請爲前鋒攻河陰城授儀同大將軍武帝圍晉州慮齊兵來援令衍從陳王守千里徑又從武帝與齊王大戰於晉州追齊師至高壁敗之仍從平并州以功加授開府封武強縣公邑千二百戶賜姓叱羅氏宣政元年爲右中軍熊渠中大夫尉迴之起逆從韋孝寬戰於武陟進戰於相州先是迴遣

弟子勤爲青州總管率青齊之衆來助迴迴敗勤與迴
子惇祐等欲東奔青州衍將精騎一千追破之執祐於
陣勒遂逃走而惇亦逃逸衍至濟州入據其城又擊其
餘黨於濟北累戰破之執送京師超授上柱國封武山
郡公賞賜七千段密勸高祖殺周室諸王早行禪代由
是大破親昵開皇元年勅復舊姓爲郭氏突厥犯塞以
衍爲行軍總管領軍屯於平涼數歲虜不入徵爲開漕
渠大監部率水工鑿渠引渭水經大興城北東至於潼
關漕運四百餘里關內賴之名之曰富民渠五年授瀛
州刺史遇秋霖大水其屬縣多漂沒民皆上高樹依大

家衍親備船楫并濟糧拯救之民多獲濟衍先開倉賑
卹後始聞奏上大善之選授朔州總管所部有恒安鎮
北接蕃境常勞轉運衍乃選沃饒地置屯田歲剩粟萬
餘石民免轉輸之勞又築桑乾鎮皆稱旨十年從晉王
廣出鎮揚州遇江表構逆命衍爲總管領精銳萬人先
屯京口於貴洲南與賊戰敗之生擒魁帥大獲舟楫糧
儲以充軍實乃討東陽永嘉宣城黟歙諸洞盡平之授
蔣州刺史衍臨下甚踞事上姦諂晉王愛暱之宴賜隆
厚遷洪州總管王有奪宗之謀託衍心腹遣宇文述以
情告之衍大喜曰若所謀事果自可爲皇太子如其不

諸亦須據淮海復梁陳之舊副君酒客其如我何王因
召衍陰共計議又恐人疑無故往來託以衍妻患癯王
妃蕭氏有術能療之以狀奏高祖高祖聽衍其妻向江
都往來無度衍有詐稱桂州俚反王乃奏衍行兵討之
由是大修甲仗陰養士卒及王入爲太子徵授左監門
率轉左宗衛率高祖於仁壽宮將大漸太子與楊素矯
詔令衍宇文述領東宮帖上臺宿衛門禁並由之及上
崩漢王起逆而京師空虛使衍馳還總兵居守大業元
年拜左武衛大將軍帝幸江都令衍統左軍改授光祿
大夫又從討吐谷渾出金山道納降二萬餘戶衍能揣

上意阿諛順旨帝每謂人曰唯有郭衍心與朕同又嘗勸帝取樂五日一視事無得効高祖空自劬勞帝從之益稱其孝順初新令行衍封爵從例除六年以恩倖封真定侯七年從往江都卒贈左衛大將軍賜甚厚謚曰襄長子臻武牙郎將次子嗣本孝昌縣令

宋之問字延清一名少連汾州人之問偉儀貌雄于辯甫冠武后召與楊炯分直習藝館累轉尚方監丞主奉宸內供奉武后游洛南龍門詔從臣賦詩左史東方虬詩先成后賜錦袍之問俄頃獻后覽之嗟賞更奪袍以賜于時張易之等承昵寵甚之問與閭朝隱沈佺期劉

允濟傾心媚附易之所賦諸篇盡之問朝隱所爲至爲
易之奉溺器及敗貶瀧州朝隱崖州並叅軍事之問逃
歸洛陽匿張仲之家會武三思復用事仲之與王同皎
謀殺三思安王室之問得其實令兄子曇與冉祖雍上
急變因勾贖罪由是擢鴻臚主簿天下醜其行景龍中
遷考功員外郎諂事太平公主故見用及安樂公主權
盛復往諧結故太平深疾之中宗將用爲中書舍人太
平發其知貢舉時賕餉狼籍下遷汴州長史未行改越
州長史頗自力爲政窮歷剡溪山置酒賦詩流布京師
人人傳諷睿宗立以僧險盈惡詔流欽州祖雍歷中書

舍人刑部侍郎倡飲省中爲御史劾奏貶蘄州刺史至是亦流嶺南並賜死桂州之間得詔震汗東西步不引決祖雍請使者曰之間有妻子幸聽訣使者許之而之問荒悻亦不能處家事祖雍怒曰與君俱負國家當死奈何遲回邪乃飲食洗沐就死祖雍江夏王道宗甥及進士第有名于時魏建安後汜江左詩律屢變至沈約庾信以音韻相婉附屬對精密及之間沈佺期又加靡麗回忌聲病約句準篇如錦繡成文學者宗之號爲沈宋語曰蘇李居前沈宋比肩謂蘇武李陵也

薛節度能字太拙汾州人會昌六年進士第大中末書

判中選補整厓尉李福鎮滑表署觀察判官歷御史都
官刑部員外郎福徙西蜀奏以自副咸通中攝嘉州刺
史遷主客度支刑部郎中權知京兆尹事授工部尙書
節度徐州徙忠武廣明元年徐軍戍激水經訖能以舊
軍館之城中軍懼見襲大將周岌因逐能屠其家自稱
留後能僻於詩日賦一章集十卷

裴誨平遙人唐吏部尙書

相里太師金字國寶汾州西河人爲人勇悍而能折節
下士事晉王爲五院軍隊長梁晉戰柏鄉胡柳皆有功
遷黃甲指揮使同光中拜忻州刺史是時諸州皆用武

人多以部曲主場務漁蠹公私以利自入金獨禁部曲不與事厚其給養使掌家事而已遷隴州防禦使廢帝起兵鳳翔馳檄四鄰四鄰未有應者獨金首遣判官薛文遇見廢帝往來計事廢帝卽位德之拜保義軍節度使晉高祖起太原廢帝以金爲太原四面步軍都指揮使高祖入立徙鎮建雄罷爲上將軍天福五年卒贈太師

今汾陽縣小相里之北太師墓有二碑並列一爲上騎都尉相里瑞碑漫滅特甚其可識者曰上騎都尉相里府君之碑曰相里瑞字鳳威曰夫人任氏一爲

建雄軍節度使金碑碑文云顧瑱生大業大業
生庭堅庭堅仁壽爲大理官至殷末有理徵爲殷伯
其孫仲明逃紂之禍故去玉而稱里氏至周時晉有
大夫里克其妻同成氏攜小子季連避地居於相城
時人遂呼爲相里氏相里武爲漢御史相里覽爲趙
將軍案相里瑞唐時人蓋金之遠祖然則金世居汾
州西河而五代史云并州人考之未審也又碑文云
字國寶而史云字奉金碑文云贈太子太師而史云
贈太師碑文云封西河郡開國侯而史遺之顧炎武
金石文字記曰莊子書言相里勤之弟子韓非子言

有相里氏之墨。今汾陽縣大相里小相里二村。相里氏之後。尚有數十家。因考北齊寺碑題名。多相里氏。史言武士驥娶相里氏。士。發并州文水人。去此不遠。至今千有餘年。而裔孫猶居於此。不過晉俗淳樸。而山谷之險。猶足以自保。故能累代不遷。若山東河南。則兵火之餘。人民亡散。欲求元時遺族。已寥寥不可見矣。

薛尚書右丞融。汾州平遙人。少以儒學知名。唐明宗時。爲右補闕。直宏文館。晉高祖鎮太原。融爲觀察判官。高祖徙鄆。欲據太原拒命。延見賓佐。問以可否。而坐中或贊成之。或恐懼不敢言。融獨從容對曰。融本儒生耳。軍

旅之事未嘗學也進退存亡之理豈易言哉高祖不之責也高祖入立拜吏部郎中兼侍御史知雜事累拜左諫議大夫遷中書舍人融曰文辭非臣所長也遂辭不拜時詔修洛陽大內融上疏切諫高祖褒納其言詔罷其役遷御史中丞改尙書左丞分司西京卒年六十

侯齊國公益汾州平遙人祖父以農爲業唐光化中李克用據太原益以拳勇隸麾下從莊宗攻大名先登擒軍校擢爲馬前直副兵馬使征劉守光先登遷軍使破洛州爲機石傷足莊宗親以藥傅其瘡及愈改護衛指揮使梁小將李立李建以驍勇聞軍中憚之會莊宗與

梁人戰河上益挺身出關擒其二將遷馬前直指揮使
莊宗入汴爲本直副都校從明宗討趙在禮於鄴會諸
軍推戴明宗益脫身歸洛莊宗撫其背出涕明宗立益
面縛請罪明宗曰爾盡忠節又何罪也改本直左廂都
校天成初朱守殷據夷門叛益率所部斬關先入轉左
右馬前從馬直都校領潘州刺史王都據定州叛益從
王晏球攻討會契丹來援益逆擊之破其衆唐河北克
其城授寧州刺史入爲羽林軍五十指揮都校領費州
刺史時夏帥李仁福卒子彝超擅命自立以邀節鉞命
益帥師討之明宗不豫遂追還應順初路王舉兵鳳翔

以益爲西面行營都虞候。益知軍情必變，稱疾不奉詔。執政怒，出爲商州刺史。蜀軍寇金州，益率鎮兵襲擊，大破之。詔賜襲衣名馬，加西面行營都巡檢使。晉初，召爲奉國都校，領光州防禦使。范延光反，大名張從賓據河陽，爲聲援。晉祖召益，謂曰：「宗社危若綴旒，卿能爲朕死邪？」益曰：「願假銳卒五千人，破賊必矣。」以益爲西面行營副都部署，率禁兵數千人，次虎牢。從賓軍萬餘人夾汜水而陣。益親鼓士乘之，大敗其衆，擊殺殆盡。汜水爲之不流。從賓乘馬入水溺死。築京觀，刻石紀功。晉祖大喜，拜河陽三城節度，充鄴都行營都虞候。會延光以城降。

移鎮潞州。天福四年，晉祖追念虎牢之功，遷武寧軍節度。同平章事遣中使謂益曰：「朕思卿前年七月九日大立戰功，故復以此月此日徙卿鎮彭門，領相印，仍賜門戟，改鄉里爲將相鄉，勲賢里。」九月，徐州大火，益出金粟賑之。明年，徙鎮秦州，充西面都部署，階州義軍校王君懷苦其刺史暴虐，率衆數千投蜀，請爲先鋒，下秦城諸州。益聞之，懼，請援於朝。又潛遣書於蜀，將以達誠意。少帝聞之，疑爲邊患，議徙於內地。會蒲帥安審琦移鎮許下，以益爲河中尹，護國軍節度。契丹入汴，益率僚屬歸京師，詣契丹主，自陳不預北伐之謀。契丹授以鳳翔節。

度漢祖卽位加兼侍中益自以嘗受契丹命聞漢兵入洛憂之浚城隍爲備孟昶遣益所親掌樞密王回齎書招益復遣蘇州刺史吳崇惲厚遺之崇惲本秦州押衙益故吏也及何重建爲帥遣崇惲奉表以階秦歸蜀授刺史故昶遣之益遂與其子歸蜀昶令重建率川兵數萬出大散關以應之漢祖知其事遣客省使王景崇率禁軍數千倍道趨岐下召益入朝時漢祖已不豫召至卧內謂之曰侯益貌順朝廷心懷攜貳爾往至彼如益來卽置勿問苟遲疑不決卽以便宜從事景崇至京兆合岐雍邠涇之師以破蜀軍益懼卽謀入朝會聞漢祖

崩景崇欲誅益慮隱帝不知先朝密旨從事程渥景崇里人也益因遣之說景崇曰君致位通顯亦可小知足何必懷禍人之心爲己甚之事乎況侯君親戚瓜牙甚衆事若妄發禍亦旋踵至矣景崇怒曰子去勿爲游說吾將族爾益知不用渥言卽率數十騎奔入朝隱帝遣侍臣問益結連蜀軍之由益對曰臣欲誘之出關掩殺之耳隱帝笑之益厚賂史宏肇輩言景崇之橫怒諸權貴深庇護之乃授以開封尹兼中書令俄封魯國公景崇聞之遂據城叛益親屬在城中餘七十口悉爲景崇所害及周祖起兵隱帝議出師禦之益獻計曰王者

無敵於天下。兵不宜輕出。況大名戍卒家屬盡在京城。不如閉關以挫其銳。遣其母妻發降以招之。可不戰而定。慕容彥超以爲益衰老作懦夫計。沮之。隱帝遣益與彥超及張彥超間進卿吳虔裕守澶州。至赤岡。周師奄至。戰留于陂。漢軍不利益臨陣。見士卒無鬪志。又占候不祥。乃與焦繼勳等夜謁周祖。周祖慰勞遣還。廣順初。封楚國公。改太子太師。俄又改封齊國公。顯德元年冬。告老以本官致仕。歸洛。遣使賜茶藥錢帛。就撫問之。宋太祖卽位。遣賜器幣。歲一來朝。太祖以耆舊厚待之。乾德初。郊祀。詔綴中書門下班禮。與丞相等。三年卒。年八

十贈中書令五子仁愿仁矩仁寶仁遇仁興仁愿至左金吾衛大將軍蓬州刺史仁遇西京內園使仁興右屯衛將軍仁愿子延濟西京作坊使康州刺史

侯刺史仁矩汾州平遙人益次子從益爲商州衙校益之討張從賓也仁矩首犯賊鋒以功領蓬州刺史充河南牙職從益歷路徐秦三鎮開運初入爲蘄毯使出爲天平行軍司馬漢初授隰州刺史至郡決滯訟一日釋繫囚百餘獄爲之空民情悅服仕周歷左羽林將軍出爲泗州刺史改通州兼屯田鹽鐵監使宋初歷祁雄二州刺史治軍有方畧歷數郡咸有善政開寶二年卒年

五十六太祖甚惜之特命中使護喪子延廣延之咸平二年進士及第

田紹斌汾州人仕河東劉鈞爲佐聖軍使戍遼州周顯德四年領五十騎來歸鈞屠其父母家屬世宗召補驍武副指揮使宋初隨崔彥進征李筠攻大會寨破之以功遷龍捷指揮使又敗筠於澤州茶碾村筠退保澤州紹斌鑿濠圍守流矢中左目前軍部署韓令坤以其事聞及太祖召見於潞州紹斌殺晉軍益衆奪其鎧甲又從討李重進於楊州壁城南圍三日城潰斬首踰千級賜袍帶緡帛尋補馬軍副都軍頭龍衛指揮使下荆湖

平嶺南率皆從行討蜀隸大將劉延讓麾下會全師雄
寇神泉紹斌率所部敗其黨數千時漢劍道梗因賴以
寧太祖遣使孫晏齎詔賜資有加凡在蜀三歲剽盜殄
除還改龍捷都虞侯嘗盜官馬質直盡償傳進事發獄
具有司引見講武殿紹斌稱死罪太祖知其驍勇欲宥
之執於門外遣內侍私謂之曰爾今死有餘責紹斌曰
若恩貸臣死當盡節以報俄復引見釋之且密賜白金
會征江南擇諸軍借事得五百人爲步鬪軍令紹斌領
之及率雲騎二千抵昇州城下克獲居多太祖親討河
東命紹斌從何繼筠扼契丹兵于北百井奪賊鼓幟而

還太平興國初擢龍衛軍指揮使領江州刺史二年梅
山洞蠻叛命與翟守素分徃擊之至邵州聞蠻酋符漢
陽死去其居十里大潰其衆擒蠻二萬令軍中取利劔
二百斬之餘五千遣歸諭諸洞自是其黨帖服太宗賜
以金帛緡錢金帶鞍馬歷天武日騎軍指揮使改馬步
都軍頭出戍鎮定高陽關曹彬之攻幽州也命爲先鋒
指揮數遇契丹兵鬪奪牛羊器甲師還召見便殿加領
溪州團練使復遣屯北面端拱元年拜冀州防禦使尋
改解州淳化中爲河中同丹坊鄜延橫嶺蕃界都巡檢
使會鄭文寶議城席雞城寨爲清遠軍紹斌與文寶領

其役城畢以文寶之請命爲知軍事至道元年拜會州觀察使仍判解州俄充靈州馬步軍部署領徒入蕃討賊斬首二千級獲羊馬橐駝二萬計馬以給諸軍之闕者捷聞手詔嘉諭之數部金粟帛詣靈武清遠遠人警服不擾未幾皇甫繼明白守榮等督轉餉於靈州紹斌率兵援接抵鹹井賊踰三千餘來薄陣且行且鬪至耀德凡殺千人寇復尾後紹斌爲方陣使被傷者居中白將騎三百步弩三百與敵兵确於蒲洛河大敗之初守榮與紹斌爲期既而繼明卒故後一日遂爲賊所圍守榮等欲擊之紹斌曰蕃戎輕佻勿棄輜重與戰當按轡

結陣徐行。守榮等見日才在。兵來迎。勿預言。事紹斌。因率所部去輜重四五里。繼遷初見紹斌旌旗。不敢擊。守榮等自欲邀功與戰。賊先伏兵。以羸騎挑戰。已而伏發。守榮等敗。丁夫愕眙道。蹂踐至死者衆。紹斌率所部徐還。一無遺失。至清遠。與張延州會食。見濠中人裸而呼曰。我白守榮也。繩引而上。解衣遺之。遣內侍馬從順驛聞。太宗益嘉之。優詔褒美。時命李繼隆范延召討繼遷。就命紹斌爲本州都部署。兼內外都巡檢使。繼隆以蒲洛之敗。上聞。言紹斌握兵不顧。自言靈武非我不能守。欲圖方面有異志。太宗怒曰。此昔嘗背太原來投今

又首鼠兩端真賊臣也卽遣使捕繫詔獄鞫問貶右監門衛率府副率虢州安置真宗卽位召還授右監門衛大將軍領叔州刺史尋改萊州防禦使詔還其所籍居第賜良馬十四調環慶靈州清遠軍部署慶州有野雞族數爲寇掠道路患之嘗有驍捷卒二十餘徃邠州爲其掠奪卽馳告紹斌紹斌召其酋帥三人斷臂馘剗放還寇感而化帖服紹斌素勇悍與同職頗不叶轉運使宋太初每按部靈州清遠多貿易紹斌語發其私太初心銜之及還朝言紹斌之過尋赴召直其事咸平二年北面寇警復命爲鎮定高陽關路押先鋒隸傅潛潛遣

與石普並戍保州。普陰與知州楊嗣議出兵擊討之。及夜，普嗣未還，紹斌疑其敗，即領兵援之。普嗣果爲賊所困，度嚴涼河，頗喪師衆。及紹斌至，即合兵疾戰，獲一百四十餘人。以勞遷邢州觀使。潛屯中山，紹斌三馳書於潛，且言邊重大至，但列兵唐河南背城與戰，慎無窮追。潛性吳懦，聞之，益不敢出。賊衆益熾，焚劫城寨，車駕駐大名。召潛屬吏，詞逮紹斌，即遣使械繫下御史臺鞠問。免官，黜爲左衛率府副率，送往上都，禁其出入。五年，授右千牛衛將軍。致仕。景德初，起爲左龍武軍將軍，永城兵馬都監。三年，遷左監門衛大將軍。帝以紹斌久失

職不宜在衝要乃徙考城都監大中祥符初領長州刺史從東封朝覲壇就班軍士建充庭旗旗倒壓紹斌仆地遽起無傷時紹斌已老其壯健若此遷左領軍衛大將軍領康州團練使鞏縣都監二年卒年七十七紹斌長兵間習戰法以格鬪立功然性暴戾故屢被黜子守信爲內殿崇班閤門祇候

李安化軍留後浩字直夫家本綏州徙西河浩務學通兵法以父定蔭從軍破僂智高韓絳城囉兀領兵戰賞堡嶺川殺大首領訛革多移斬首千三百餘級積官供備庫副使廣西都監哀西北疆事著安邊策謁王安石

安石言之神宗詔對改管幹麟府兵馬未行又從章惇於南江引兵由三路屯鎮江入敘州討舒光貴破盈口柵下天府會於洽州入懿州蠻酋田元猛元喆合結伶拒官軍浩分兵擊之殺結伶降元猛元喆遂城懿州進討黔江蠻復城黔江惇上其功謂不當與他將比擢引進副使熙河鈐轄李憲討山後羌浩將右軍至台龍嶺會戰遣降羌乞噍輕騎突敵帳俘其酋冷雞朴李密撤馘二千遷東上閣門使爲副總管知河州安撫洮西五路大舉浩將前軍復蘭州遷引進使隴州防禦使知蘭州兼熙河涇原安撫副使坐西關失守及報上不實再

貶秩旋以戰吃囉瓦共連立功復之哲宗卽位拜忠州防禦使捧日天武都指揮使馬軍都虞候進黔州觀察使歷鄜延太原永興環慶路副都總管再知蘭州卒贈安化軍留後

王景莊嗣宗字希阮汾州人曾祖同節寶鼎令祖待價汾州防禦推官父夢證成州軍事判官嗣宗少力學自奮遊京師以文謁王祐頗見優待開寶八年登進士甲科補秦州司寇叅軍侍御史路冲知州事爲政苛急盜賊羣起嗣宗乘間極言其闕失冲大怒繫嗣宗於獄又教無賴民被罪者訟嗣宗治獄枉濫朝廷遣殿中丞王

廷範按之具獲訟者証問狀嗣宗乃得釋太宗征河東
嗣宗陳邊事召赴行在授大理寺丞通判睦州改右贊
善大夫徙河州太宗遣武健卒潛察遠方事嗣宗械送
京師因奏曰陛下不委任天下賢俊猥信此輩以爲耳
目臣竊不取太宗怒其橫遣使械嗣宗下吏削秩會赦
復官尋以秘書丞通判澶州並河東西植樹萬株以固
隄防上言本州榷酤斗量校以省斗不及七升民犯法
釀者三石以上坐死有傷深峻臣恐諸道率如此制望
詔自今並準省斗定罪從之入爲三司開折推官以左
正言充河北轉運副使時邊境用兵崔翰爲大將嗣宗

每以苦言激其展効就賜緋魚太宗將議親征嗣宗上疏言契丹必不至之狀甚見嘉納改左司諫賜白金千兩入爲度支判官改駕部員外郎妻病夜挾本司署門取藥爲直官宋鎬所發坐罷職頃之出知興元府徙京西轉運使又移河北賜金紫貝州驍捷卒五十餘人謀竊發嗣宗率吏悉擒之優詔嘉獎遷虞部郎中賜錢百萬至道初移河東轉運使以爲政暴率聞徙知耀州又知同州加比部郎中淮南轉運使江浙荆湖發運使揚楚間有窄家神廟民有疾不餌藥但竭致祀以徼福嗣宗徹其廟遷名方刻石州門自是民風稍變初漕運經

泗州浮橋舟多覆壞嗣宗徙置城隅遂獲安濟又建議
外任官俸薄貪猥者或致豐給廉謹者終嬰貧匱請以
公田均賜之就改職方郎中咸平三年以漕運稱職就
拜太常少卿踰年以右諫議大夫充三司戶部使改鹽
鐵使嘗與度支使梁鼎戶部使梁顥同對言曰國家經
費甚繁賦入漸少加以冗食者衆尤爲耗蠹所宜裁節
若用度不足卽復重擾於民矣況西北二邊未平有饋
運之煩臣等會議事可省者願條列以聞從之明年將
郊祀嗣宗因條上應奉諸物以及工作凡減雜物十萬
六千省工九萬九千又言計省條奏事有可紀者望令

判使一員選錄送史館詔以三司務繁不當日有纂錄
可逐季錄送會罷三部使改左諫議大夫知通進銀臺
司兼門下封駁事出知并州兼并代部署州境有卧龍
王廟每窮冬闔境致祭值風雪寒甚老幼踣於道嗣宗
亟毀之轉運使鄭文寶上其政績有詔褒美先是西邊
市馬以給北邊戰士有瘠弱者卽送闕下暑月道路遠
多死嗣宗建議以汾州地涼接樓煩諸監美水草請就
牧放從之召拜御史中丞大中祥符間真宗告謁太廟
嗣宗立班失儀因自首真宗謂憲官當守禮法以其性
麤畧不之責加兼工部侍郎權判吏部銓嗣宗剛果率

易無所畏憚每進見極談時事或及人間細務頗輕險
好進深詆忝知政事馮拯之短遂結宰相王旦弟旭使
達意於旦以爲助旦疾其醜行因力庇拯嗣宗大怒知
制誥王曾從妹適孔冕家閨門不睦曾從東封至冕家
啜茗中毒得良藥乃解事已暴露曾密疏方行大禮願
罷推究宰相亦以冕先聖後將有褒擢乃隱其事嗣宗
獨謂曾誣構冕當反坐乃求寢息會愆雨嗣宗請對言
孔冕爲王曾所訟儻朝旨鞠問加之鍛鍊則冕終負冤
枉又侯德昭援赦敘緋年考未滿以欺詐得之非吏部
令史自首亦無由知沿堂行首李永錫坐贓除名復引

充舊職尋送銓授令錄真宗亟召王旦等詰之旦曰孔
冕之罪朝議特爲容隱不令案聞誠非冤枉也德昭據
吏部奏驗乃行制命及其首露卽已追奪永錫先爲縣
吏坐爲本部節度市羊不輸筭除名及沿堂闕人李沆
以其魁梧因選擬官復用爲副行首在省祇事四年陳
牒乞班敘用因復送銓真宗曰止此乃致旱邪嗣宗理
屈復以他辭侵旦旦不與抗乃已明年十月嗣宗復請
對言去歲八月至今年十月不雨宿麥不登及秋亢鄆
苦雨河溢害稼刑政有失致成災沴孔冕冤枉播在人
口王曾尙居近班願示黜退以正朝典臣請露章以聞

眞宗語王旦等曰曾實無罪若嗣宗上章亦須裁處旦
曰冕不善之迹甚衆但以宣聖之後不欲窮究謂冤枉
感傷和氣恐未近理趙安仁曰今若再行按問冕何能
免罪王欽若曰臣請審問嗣宗若再鞫冕不能自隱如
何區處明日嗣宗復對旦謝前言之失眞宗亦優容之
其強妄多此類將祀汾陰以永興重地思得大臣才兼
文武者鎮之因謂宰相曰嗣宗嘗自言知武事可授廉
車以當此任宜召問之嗣宗願奉詔卽拜耀州觀察使
知永興軍府眞宗作詩賜之時种放得告歸山嗣宗逆
於傳舍禮之甚厚放旣醉稍倨嗣宗怒以語譏放放曰

君以手搏得狀元耳何足道也初嗣宗就試講武殿搏趙昌言帽擢首科故放及之嗣宗愧恨因上疏言所部兼并之家侵漁衆民凌暴孤寡凡十餘族而放爲之首放弟姪無賴據林麓樵採周回二百餘里奪編氓厚利願以臣疏下放賜放終南田百畊徙放嵩山疏辭極于詬辱至目放爲魑魅真宗方厚待放令徙居嵩陽避之四年邠寧陳興擅釋劫盜徒嗣宗知邠州兼邠寧環慶路都部署城東有靈應公廟傍有山穴羣狐處焉妖巫挾之爲人禍福民甚信向水旱疾疫悉禱之民語爲之諱狐音前此長吏皆先謁廟然後聽事嗣宗與其屬燁

其穴得數十狐盡殺之淫祀遂息徙知鎮州發邊肅姦
雖肅坐貶嗣宗嘗言徙种放掘邠狐拔邊肅爲去三害
居二歲召還授樞密副使檢校太保寇準爲使嗣宗與
之不叶累表解職授檢校太傅大同軍節度知許州嗣
宗嘗游是州別墅在焉時人以爲榮移知河南府天禧
初改感德軍節度洛下訛言相驚徙知陝州再表請老
且求入覲遣使召還郊祀改靜南軍節度旣至闕下病
足不能朝謁乃求再知許州不復議休退寇準爲相素
惡之特命以左屯衛上將軍檢校太尉致仕表求面辭
以足疾艱於拜起特免舞蹈許其子扶掖之對數刻賜

錢百萬還許下準貶朝議以嗣宗藩輔舊臣特令月給奉五十千嗣宗尤睦宗族撫諸姪如已子著遺戒以訓子孫勿得析居又令以孝經弓劒筆硯置壙中五年卒年七十八廢朝贈侍中謚曰景莊錄其子二人甥二人官嗣宗事三朝最爲宿舊所至以嚴明御下尤傲狠務以醜言凌挫羣類爲中丞日嘗忿宋白郭贇邢昺七十不請老屢請真宗敕其休致又遣親屬諷激之及嗣宗晚歲疾甚猶享厚祿徘徊不去嘗謂人曰僕惟此一事未能免物議衆皆嗤之嗣宗好爲文而札尤甚奉祀之歲近臣皆爲頌記宰相以嗣宗所撰不足發揮盛德慮

爲後所誦乃不許刻石所著有中陵子三十卷子堯臣
內殿承制唐臣太子中舍從子舜臣供奉官閤門祇候
禹臣太子中舍

李彥哲汾州平遙人屢有武勲累官兵馬大元帥

裴定平遙人宋大理評事累官禮部侍郎

吳希尹石州人父永舉進士少好學廣蓄書籍構家塾
顏曰萬卷堂希尹力學知名當世大定中登進士第官
至同知陝西東路轉運使子章亦舉進士官至翰林學
士元遺山嘗從受學

馬編修天來字雲章汾州介休人經義進士博學多技

能畫入神品多作詩欲別出廬仝馬異之外在太學十九年貧苦人不能堪而談笑自若大安初調潁州司候靈壁簿召爲國史編修官正大九年沒於京師年六十有一

杜豐字唐臣汾州西河人祖遇仕金爲評事父珪以積德好施鄉稱善人豐少有大志倜儻不羣通兵法仕金爲平遙義軍謀克佩銀符太祖取太原豐率所部來降皇舅按赤那延授兵馬都提控從國王按察兒攻平陽先登克絳州解州諸堡招集流民三萬餘家以功賜金虎符陞征行元帥左監軍金人南遁遂以豐守河北庚

辰上黨張開以萬衆寇汾州豐率精騎五千敗之從國
王阿察兒下懷孟破溫谷木澗等寨輒先登攻洪洞西
山斬首六百餘級攻松平山破之賊墮崖死以萬計獲
生口甚衆金將武仙等往來鈔掠平陽太原間行路梗
塞壬午授豐龍虎衛上將軍河東南北路兵馬都元帥
便宜行事遂破玉女割渠等寨俘獲千餘人丙戌從按
赤那延攻益都金守將突圍出豐戰扼之斬首千級捕
虜二十人益都下遂畧地登萊降島民萬餘己丑以才
部取沁州由是銅鞮武鄉襄垣綿山沁源諸縣皆下辛
卯命豐撫定平陽太原真定及遼沁未降山寨皆平之

乙未陞沁州長官長官者國初高爵也在沁十餘年寬
繇薄賦勸課農桑民以富丁未請老丙辰疾卒于家
年六十有七沁人立祠歲時祀焉子三人思明思忠思
敬思敬事世祖潛邸累遷治書侍御史阿合馬敗臺臣
皆罷去思敬以帝所眷知獨留出爲安西路總管僉陝
西行省事歷汴梁總管再入中臺爲侍御史時桑哥以
罪誅風紀爲之振肅未幾拜叅知政事改四川行省左
丞不赴陞中書左丞致仕年八十六卒謚文定子四思
明字彥和襲明威將軍吉州路達魯花赤思忠淇陽固
鎮鐵冶提舉思敬四川行省左丞思問字紀甫簽河西

隴右道提刑按察司事。思明長子恕。同知無錫州事。次子淵。知長寧州。兼管內勸農事。思忠長子憲文。沁州與魯長管。思敬次子肯構。字繼宗。河東山西道慰使。贈康靖公。三子肯播。字繼先。知會州。四子肯獲。陝西省左丞。肯構次子宣。集賢大學士。贈晉國公。四子惠。字仲義。尹龍游縣。肯獲長子文獻。字仲徵。晉寧同知。豐弟珏。字舜臣。河東南北路與魯萬戶。子安民。襲父爵。安民第二子惟孝。與魯千戶。

梁瑛。汾州平遙人。父秉鈞。字仲平。仕金爲大理評事。七子。瑜。玟。瑛。珪。珍。瓊。琮。瑜與琮相繼爲本縣令。瑛善騎射。

勇力絕人。元兵南下，授元帥左監軍，屢出奇計，入關定秦隴，擢征行都元帥，以縣行平安州事。安集勞徠，人獲寧息。武仙陷平陽，瑛進兵，仙大敗，棄城走入覲，授御前千戶。扈從南征，下西和興元十數城，次唐鄧，時軍民降附日衆，他將以糧不給，欲盡殺之。瑛曰：「殺降不祥。」凡隸麾下，悉得不死。從元帥塔海甘不圍資州，踰月始下。塔怒，欲悉坑之。瑛曰：「今始得一城而坑之，他城未易下也。」塔善其說，瑛起行陳，經百數十戰，未嘗敗北，所全活者亦不下數萬計。成都平，詔充西京平陽太原京兆延安五路萬戶。瑛以太原初定，民多離散，請給復三年，詔從之。

之丙辰三月卒年六十有六。瑛長子翼襲行軍千戶。遷成都轉運使。次子羽太原路管軍千戶。三子天翔四川道肅政廉訪使。琮子翔尹太平縣。次子翥尹文水縣。天翔長子時中以進士爲信州路總管府治平。次子時正尹清河縣兼管本縣諸軍與魯勸農事。三子時仁簽浙東海右道肅政廉訪司事。四子時義尹成紀縣。翥長子用剛鄜州同知。次子用直尹蕭山縣。

袁湘字潤夫臨縣人。金末王公佐持節鎮葭蘆當元勁兵之衝。辟湘聞於朝授忠顯校尉。延長主簿以功擢武節將軍。臨泉令。及王公佐卒湘夜渡河詣元將李罕營。

降以便宜升臨爲州卽以湘爲州帥遣將州兵畧地鄜
延悉下之授延安路兵馬總管湘勸耕稼裁抑游惰使
各食其力儒生之賢而文者欲仕則登之幕府以師羣
更不則陞之學官以範多士會大料民止籍主戶漏其
僑家浮客者其後河東山西來徙其民湘謀使者勿徙
尋有詔令民隨在占籍同列害其能多行金帛貴幸以
訟湘徵使就辨湘贊貴幸幣殊涼薄廷臣以訟者之言
方騰能不以賄免重其忠儉及大封宗室創所治爲公
主湯沐邑有說湘厚歛入謁可結主知且無令同列得
先之也湘曰吾豈剥下市寵者邪不行世祖方爲太弟

征南詔駐兵六盤山。相見行府建言。始延安之籍民爲兵。皆懸賞募之人。率授銀三十兩始行。及遠戍久役。津餽不如於前。老稚日困於家。勇者挺身而孤亡。怯者連伍而俱歸。軍吏以法誅之。莫之能止也。非大選閱郡民厚業。饒丁者。更代以休其力。盈其氣。則兵帳不完。世祖然其策。歲癸丑冬。將適京兆。未至。以病歸。卒於家。

陳政。昭毅大將軍。資壽之子。資壽官寧鄉。因家焉。政至元中。爲平陽太原巡鹽規運官。以武績歷官至定遠大將軍。第致至元中。爲本縣簿尉。遷縣令。後擢宜興州同知。

王珪介休人至正間碗子城討賊有功擢步兵元帥後
曹濮賊亂又討平之擢都督大元帥

張司業益西河人性謹厚以廷試第一官國子監司業
益嘗受學於王天祺儒者也故其持身接士溫恭有器
度

王仲文介休人至正十八年判光州二十年改儒林郎
總管府判官二十六年拜中書省門下右丞相

裴見素平遙人元工部尚書

蘭以權字世衡汾州人博學能詩洪武中選授中書省
照磨以安撫廣西功擢禮部員外郎進應天府尹

霍華字希伊孝義縣人永樂丙戌進士少年登第奉勅歸娶鄉里榮之後拜監察御史

溫恭平遙縣人驍勇絕倫正德中有功任征西大元帥子孫世襲

孔天胤字汝錫汾州人嘉靖壬辰殿試第二以宗親例不得授京職外補陝西按察司僉事提督學政降知祁州遷河南按察司僉事兵備潁州復以布政司叅議提督浙江學政歷陝西按察使右布政使遷河南左布政使致仕歸天胤好讀書善詩文著有文谷集若干卷

霍韜平遙縣人嘉靖七年官總兵鎮撫陝西甘肅縣舊

王守履字存予寧鄉縣人天啟壬戌進士知許州州比歲不登守履善撫其民循聲大著擢戶部員外郎疏陳崔呈秀可殺四大罪中間並及陳爾翼奸狀及爾翼疏辨卽就其疏駁之申理前說得嚴旨降調崇正初復原官國朝以薦起之爲湖北監察御史

張煊字葆光介休縣人明崇正戊辰進士知安邱縣歷章邱盧龍二縣擢監察御史以薦舉失實免官本朝仍起爲御史劫尙書譚太及其黨不克以冤死旋得昭雪加贈通議大夫太常寺卿子基遠以父官官之

王鳳翼寧鄉縣人崇正丁丑進士授漢中推官時盜賊四起鳳翼設策防守增修城垣保安境內尋擢刑部主事國朝授山東按察司僉事

梁欽構字翊宸介休縣人順治丁未進士知長垣縣丁憂起補固始縣皆有政聲行取吏部歷考功驗封司遷文選司郎中充會試同考官請假歸里

李應選平遙人明季出行伍守固關李自成之亂不降賊招聚義兵取永寧祁縣等處國朝隨攻太原以功陞遊擊收地千餘里招服三千餘賊隨大軍入陝賀真叛緝斬賊魏景龍招降賊將以兵三千守漢中以功加

系將管關山遊擊事攻叛賊胡向震於西鄉洋縣斬首二千收寨二十餘處大戰喬麥山下生擒首領白和尚等十二人又斬餘賊五百餘級追賀賊入漢中大敗之尋復漢中督修棧道擢授副將

史詒孝義縣人以進士歷官廣西道監察御史巡按江南福建兩省按臨惠安縣某知縣奇貪極酷公署鋪陳至三萬餘金翼以賄免詒入境卽行題系有同年某饋黃白酒各一器啟視之皆黃白金也反金記過嘗自矢曰枉法要一錢不得渡江歸所至咸稱其廉明

田芳孝義縣人以進士歷官陝西隨營糧道轉河南睢

陳道兼攝歸德府提督江西學政擢太常寺正卿清廉正直所至皆有異績

劉發永寧州人由行伍官浙江台州營守備累至武昌叅將康熙十三年三藩爲亂發隨大兵進勦吳三桂冒矢石勇果當先復岳州以功擢台協副將

霍焜字岐望孝義縣人順治十七年以舉人授馬湖府推官旋權知馬湖及敘州府十八年值兵亂二府俱新闢無城守焜率領家人擊賊負重傷幼子垣陷敵死焜設方畧卒平之兩郡以寧尋遷員外郎督贛關稅務轉兵部郎中授四川川東道擢湖廣布政使司叅議所著

書曰採木末議曰巡東泊書

樊冕臨縣人康熙甲午舉人知鄆城縣著有瑟堂治規一書循而行之蒞任甫七月以憂歸

于準字子繩永寧州人兩江總督太子太保謚清端之孫也以蔭知臨清州轉刑戶兩曹授江南驛鹽道復歷直隸守道浙江按察使四川布政使擢副都御史巡撫貴州移巡撫江蘇閱五年免官歸雍正三年復原職九年卒於家

張崇樸介休縣人以監生知鉛山縣歷孟商邑二縣所至有惠政韓文公孟人也遴其後詳請得題準爲五經

博士

梁成武介休縣人雍正癸卯舉人知實雞縣歷長武渭南有治才

梁攸介休縣人雍正庚戌進士權知涉縣有惠政以涉人安之遂補實改中牟縣兩充同考官年六十七告歸攸子五文元文霖文山文醇文五皆親教之文霖文山已酉與父同舉於鄉文山癸丑進士選翰林院庶吉士文元文醇又以己卯舉文五以乾隆戊午舉文山授編修擢左春坊左諭德乾隆七年督學廣東生平慎交遊勵廉隅

梁溥介休縣人雍正乙卯舉人以會試明通授保德州學正擢知閔縣歷榮澤鞏祥符三縣閔北三鱣堂漢楊震校書處爲修葺新之其在榮澤也適中牟調縣民赴役溥捐資募閒民代之在鞏修杜少陵祠置田以供祀事

降仲介休縣人乾隆癸酉舉人知齊河縣有惠政例散積穀於民會歲饑捐俸五百餘兩代償之

段瑄字士瑤汾陽人雍正八年以孝廉保舉知棲霞縣歷海豐蘭山有政績清操自勵居官十有八年致仕後貧不能給朝服

重柴介休縣人幼失父事母以孝稱由貢生知宿州廉
潔愛民值歲饑先開倉賑後詳請其秋蝗不入境民各
輸一錢以建亭名曰一文亭病歸起補安州丁母憂服
闋不復仕